

## 開放文學－歷代筆記－夷堅甲志 卷第十一

梅先遇人 予宗人慶善郎中興祖紹興十二年。為江東提刑。治所在鄱陽。王元尚書鼎從假二卒往夔峽。既回拜於廷。其一梅先者。獨著道服。拜至十數不已。慶善訝之。答曰。伺郎中治事退。當請問以白。少頃慶善坐書室。梅復至曰。初至夔州數日。有道士歷問所從來。令某隨之去。某應曰。諾。道者曰。汝當有妻孥。安能捨而從我。某曰。惟一妻一子。今得從先生。視彼如涕唾耳。道者甚喜。曰。汝能若此。良可教。吾將試汝。即於糞壤中拾人所棄敗履令食。初極臭穢。強齧不能進。道者笑自啣之。曰。如我法以食。曆數日。覺不復臭而味益甘軟。又問所以來此為何事。答曰。奉主公命為王尚書取租入。曰。如是當歸畢之。此公家錢如未了。不可從我。他日未晚也。某曰。家在江東。相距數千里。豈能再來。曰。汝思我。我即至矣。又授藥方三道。曰。若乏用時。可合此藥貨。視一日所用留之。有餘棄諸道上。以惠貧窶。或無食。則茹草履。人與酒食。但享之。特不可作意。大抵無心乃得道耳。某拜之數十。又與某道服。曰。汝歸見主公時。拜之如拜我。但作此衣。勿易也。慶善曰。果如此。勿復為走卒。命直書合以自近。嘗召使坐取草履試之。梅展足據地坐。淨滌履而食。每數日即飲水少許。久之吐其滓。瑩滑如碧玉。以示慶善。慶善復還之。梅徑取投口中。食履盡乃已。時方二十四歲。即與妻異榻。曰。人世只爾。殊可厭惡。汝盍同我學道。不然。隨汝所之。妻始猶勉從。不一年。竟改嫁。慶善後予告。令往丹陽茅山。預三月鶴會。山有洞。常人欲入。須秉燭。然極不過數十步即止。梅索手而入。無所礙。聞石壁中若人叩齒行持者。至最深處得一澗。澗中水數尺。細視有書數軸。取得之。才沾漬其半。乃元祐中劉法師所受法箒也。後送慶善還丹陽。慶善有外兄病。每食輒吐。梅曰。瓢中藥正爾治此。取數粒與服。一日即思食。旬時病盡失。去慶善寓。訊代者為除兵籍。既得文書。遂辭去。後數年。曾一歸鄉里。今不知所之。

### 食蟹報

洪慶善從叔母。好食蟹。率以糟治之。一日正食。見杙上生蟹散走。大恐。呼婢撤去。婢無知。復取食。為一螯鈐其頰。盡力不可取。頰為之穿。自是不敢食蟹。

### 瓦隴夢

洪慶善妻丁氏。溫州人。雖居海濱。而性不嗜殺。後至江陰。有惠瓦隴百餘枚。不忍食。置之盆中。將以明日放諸江。夜夢丐者甚眾。裸體羸瘠。前後各以一瓦自蔽。皆有喜色。別有十餘人愀然曰。爾輩甚樂。我一何苦也。丁氏寤而思之。以瓦蔽影。必瓦隴也。夢中能密記其數。取視之。已為一妾竊食十餘枚。乃愀然者也。得活者與夢中數同。

### 促織怪

洪慶善為湖州教授日。當秋晚。宴坐堂上。聞庭下促織聲極清。詣其所聽之。則聲如在房外。復往房外。則又在庭下。甚怪之。別令一人往聽。則移在床下。又詣床下。則乃在其女床側。竟不能測。是年妻丁氏捐館。次年女亡。

### 大錄為犬

秀州華亭縣吏陳生者。為錄事。冒賄稔惡。常帶一便袋凡所謀事皆書納其中。既死。夢於家人曰。我已在湖州顯山寺為犬矣。家人驚慘。奔詣寺省問。一犬聞客至。急避伏眾寮僧榻下。連呼不出。意若羞赧。其家不得已遂遷。既去。僧語之曰。陳大錄宅中人去矣。方振尾而出。此犬腹下垂一物正方。宛如便袋狀。皮帶周匝係其腹。猶隱隱可辨。洪慶善嘗與葛常之侍郎至寺見之。詢諸僧雲然。

### 蔡衡食鱠

蔡攸之子衡。為保和殿學士。將入朝。家人呼之不醒。意其熟睡。乃為謁告。至辰巳之交方覺。謂家人曰。我非睡。乃入冥耳。初寢時。有人云。某官召。隨以行。至官府。其人入報曰。追蔡衡至。既入。獄吏問曰。近日殺生何也。答曰。某舉家戒殺。無有是事。吏曰。此間不容抵諱。吾徐思之。近往池上得鮮鯉。因鱠食之。但此一罪耳。吏曰。是也。即取鐵鉤貫頰掛樹間。數武士鬻肉。頃刻而盡。約食頃。體已復故。主者延升廳事。抗禮拱手問曰。保和相識否。吾乃太師門人沈某也。太師今安否。答曰。適方受刑。痛楚未定。少憩當言之。主者命飲以湯。即不痛。徐問諸兄弟及它事甚詳。將退。吾禱之曰。衡作惡如許。不知何以自贖。曰。盡舍平生服用庶可救。可悉取所衣朝服金帶鞍馬之屬。施慧林寺。且飯僧數百。為吾謝過。是日洪慶善適游寺。見主僧言之。雲可以為戒。未幾時。復以六百千贖所施物去。竟以是年死。六事皆慶善說。

### 李邦直夢

孫巨源。李邦直。少時同習制科。熙寧中。孫守海州。李為通判。倅廳與郡圃接。孫季女常游圃中。李望見目送之。後每出。聞其聲。輒下車便旋。邦直妻韓夫人。於牖中窺見屢矣。詰其故。李以實告。一夕夢至圃。見孫女。踵之不可。及亟追之。躡其鞋。且以花插其首。不覺驚寤。以語韓夫人。韓大慟曰。簪花者言定之象。鞋者諧也。君將娶孫氏。吾死無日矣。李曰。思慮之極。故入於夢。寧有是。未幾韓果卒。李徐令媒者請於孫公。孫怒曰。吾與李同硯席交。年相若。豈吾季女偶邪李不敢復言。已而孫還朝為翰林學士。得疾將死。客見之。孫以女未出適為言。客曰。今日士大夫之賢。無出李邦直。何不以歸之。曰。秦年不相匹。客曰。但得所歸。安暇它問。未及綢繆而孫亡。其家竟以女嫁之。後封魯郡夫人。邦直作巨源墓志曰。三女。長適李公彥。二在室。蓋作志時未為婿也。邦直行狀。晁無咎所作。實再娶孫氏雲。強行父幼安說。

### 趙敦臨夢

明州趙敦臨。為太學生。政和戊戌年。詣二相公廟乞夢。夢雲。狀元今歲方生。紹興乙卯。敦臨始登第。狀元乃汪聖錫。生於戊戌。時年十八矣。果符昨夢。

### 張太守女

南安軍城東嘉祐寺。紹興初。有太守張朝議女。因其夫往嶺外不還。怏怏而夭。蒿葬於方丈。遇夜即出。人多見之。既久寺僧亦不以為怪。過客至。必與之合。有所得錢若絹。反遺僧。嘗有二武弁。自廣東解官歸。議投宿是寺。一人知之。不欲往。一人性頗木強。不謂然。獨抵寺。方弛擔。女子已出曰。尊官遠來不易。客大恐誘之使去。即馳入城。解潛謫居而卒。有孫營葬。憩寺中。為所荏苒。得疾幾死。紹興二十年。郡守都聖與潔率大庾令遷之於五里外山間。今猶時出與村落居人接。予嘗至寺。老僧言之。猶及見其死時事雲。

### 大庾震吏

紹興二十一年二月晦。大庾令連潛。正午治事。書吏抱文書環立。忽黑氣自庭入。須臾一廳盡暗。雷電大震。吏悉仆地。令悸甚。手足俱弱。亦撲於案下。少頃即散。眾掖令起。吏死者四人。二錄事二治獄者。蓋昔皆為經界吏雲。連令說。

### 張端慙亡友

張端慙。處州人。嘗為道士。平生好丹灶爐火。初與一鄉友同泛海如泉州。舟人意欲逃徵稅。乘風絕海。至番禺乃泊舟。二人不得已少留。鄉友者得疾死。張為殯斂。寄柩僧寺。一夕寢未熟。而友至。呼其字曰。正父公酷好爐鼎。何為也。張悟其死。應曰。吾自好之。何預君事。即閉目默誦大悲咒。才數句。友已知曰。偶來相過。何為爾也。即去。久之復夢曰。我與君相從久。今當遠別。不復再見。幸偕我行數步相送。張諾之。與俱行數步。至一紅橋。友先行。語張曰。君且止。此非君所宜過。揮淚而別。既覺不能曉。後數日。廣帥王承可侍郎。令諸剎凡寄殯悉出焚。張念其故人。命僧具威儀火之城下。收其骨。至一橋擲水中。乃夢中所至處也。時紹興十八年。張生說。

### 六鯉乞命

汪丞相廷俊·宣和中·為將作少監·鄭深道資之為同寮·一日坐局·汪得六鮮鯉·將鱠之·鄭不知也·方假寐·夢六人立階下·自贊雲·李秀才·乞公一言乾少監乞命·鄭曰·不知君等何罪·俱曰·只在公一言·鄭許諾·既寤達之汪公·汪曰·適得六鯉·將設鱠·豈為是邪·遂放之·鄭自是不食魚·深道說·

### 五郎鬼

錢塘有女巫曰四娘者·鬼憑之·目為五郎·有問休咎者·鬼作人語酬之·或問先世·驗其真偽·雖千里外酬對如響·莫不諧合·故咸安王韓公兄世良尤信匿·導王令召之·巫至韓府·而五郎者不至·巫蹣跚不自安·乃出·後數日·偶至靈隱寺·鬼輒呼之·巫詰其曩日不應命·曰·門神御我於外·不能達也·

### 東坡書金剛經

東坡先生居黃州時·手抄金剛經·筆力最為得意·然止第十五分·遂移臨汝·已而入玉堂·不能終卷·旋亦散逸·其後謫惠州·思前經不可復尋·即取十六分以後續書之·置於李氏潛珍閣·李少愚參政·得其前經·惜不能全·所在輒訪之·冀複合·紹興初·避地羅浮·見李氏子輝·輝以家所有坡書悉示之·而秘金剛殘帙·少愚不知也·異日偶及之·遂兩出相視·其字畫大小高下·黑色深淺·不差毫髮·如成於一旦·相顧驚異·輝以歸少愚·遂為全經云·黃文譽說·

### 何丞相

縉云何丞相執中在布衣時貧甚·預鄉貢·將入京師·無以為資·往謁大姓假貸·閩人不為通·捧刺危坐·俟命·主人晝寢·夢黑龍蟠戶外·驚寤出視·則何公在焉·問之曰·五秀何為至此·何第五·五秀者·其人呼秀才雲·以所欲告·主人舉萬錢贈之·且曰·君異日言歸·無問得失·必過我·何試竟·復造其家·館於外廡·迨日暮·執卷徙倚楹間·主人彷彿又見黑龍蜿蜒而下·攀繞庭柱·就視之·則又何公也·心異之·密告何曰·君且大貴·毋相忘·已而何擢第·調台州判官·有術者能聽物聲知吉凶·聞譙門鼓角聲·曰·是中有貴人·誰其當之·或意郡守貳·視之不然·凡閱數日·不可意·一日何乘轎出·術者見之·曰·此真貴人·角聲之祥·不吾欺也·何後以徽宗皇帝藩邸恩·至宰相·終於太傅·贈清源郡王·

### 潘君龍異

縉雲富人潘君·少貧·嘗貿易城中·天且暮·值大雨·急避止道傍人家·不能歸·因丐宿焉·不知其倡居也·倡夜夢黑龍繞門左·旦起視之·正見潘臥簷下·心以為異·延入厚禮之·欲與之寢·潘自顧貧甚·力辭至再三·強之不可·一日醉以酒合焉·自是傾家貲濟之·不問其出入·潘藉以為商·所至大獲·積財逾數十百萬·因娉倡以歸·生子擢進士第·至郡守·其家至今為富室雲·

### 橫山火頭

常州橫山觀火頭·暑月汲井·得冰一片·有蛙立其上·方以手執冰·蛙躍去·乃食其冰·遂絕谷不食·初不知書·自此曉然·後不知所之·宣和中也·李彌正似表說·

### 松江鯉